

治隱先生續集卷之上

<答或人>

昨夕。承獲惠書。謹審日間尊候安福。開慰不可言。僕粗過。而踪地事勢。在都下不便。欲於秋夕。般眷往在於善鄉爲計耳。八月七日。再頓。

春亭先生續集卷之一

<與或人> 乙丑八月○出趙判書寅永家藏

前後書。想已入覽矣。卽今新秋。令監政履何若。仰溯區區。就悚春官姜員外。今方受由下去。令監能記認舊面否。遭其妻喪及同氣之憾。四柩同在一室。其情境令人慘然。幸令監拔例顧見。如何如何。姜員外年少有文才。親舊之所愛重者。況是令監土民。無待弟一二談也。餘留此友口伸。一一姑此不宣。伏惟令監下察。謹拜上候狀。

春亭先生續集卷之一

<答或人> 出東國名賢遺墨

自君南下後。吾懶不能問。君亦如之。惟戀積于心也。忽此便至得書。仍審侍餘學況。迓膺新休。慰滿不容言。此間才過終身之祀。罔極如新。不知所言。何間當上洛計。春前必一作洛行。是企是企。奴便促書。略草不盡。惟祝侍讀不怠。

一蠹先生續集卷之一

<答李仲平> 守恭

挑燈終宵。默坐如癡。荷瓊琚辱。不意陽春。箠我懶慢。喜不可定。拙詞書復。多慙鹵莽。白首旅館濡滯。蟣蝨滿衣。果知四十九年非。愁愁何哭焉。區區寄答。

宋淵齋作道統淵源筆帖中

一蠹先生續集卷之一

<答 缺 察訪>

梅臘將盡。伏惟靜養萬福。比因堤川之行。奉見清翰。非雅眷之至。何以及此。感慰感慰。生頓無悰緒。苦苦度日耳。新曆難得。一部送之家內。他無更求之地。不副俯勤。深恨深恨。所欲言者。非紙筆可究。只此草草。伏惟雅 缺。出內閣。

右詩若書。或出於諸家文集。或出於內閣與諸家古箱。而內閣與諸集出來。已足徵信。至於古箱所出。雖云零殘。而先生諱字與着銜昭載。故竝編敢錄。

冲齋先生文集卷之一

<與都事>

問安。前者以斗筭之量。遭逢河海。不勝大杯。迷亂失禮。迨令惶恐罔措。飲人狂藥。是誰之過與。恕照幸甚。

靜菴先生文集卷之二

<答安順之書>

久想。得見君書。欣慰何如。前日之違。迨今恨悵。無長進之歎。僕亦深病。日喪所學。而今當憲長。能副諸友之望耶。養沖公事。深可痛悼。得助飲之佐而致此歟。惠扇。多謝多謝。惟照下。

靜菴先生文集卷之二

<答安順之書>

悠悠兩地。渴思之際。得見手札。僉慰僉慰。等依舊從仕。京中亦無別消息耳。照之興老賻物。可喜可喜。餘望撫字心勞。以副僉望。適論進講之書。未暇了了。只此謹答。四月晦。孝直子剛。
子剛張玉字

松齋先生文集卷之二

<答安求禮 處順 書 己卯>

苦寂中得見手澤。兼垂客資。蘇晤何極何極。愚僅存餘命。但疾患相仍。惟餘枯骸。可能久於世耶。其未復見生平顏色。決矣。時復自念。寧禁長吁。所冀自慎自慎。如見大立。傳吾此懷。餘難一。謹此。大立李弘幹字○孟冬初旬有七日松齋

長夜無燈。不眠獨坐。可任此間耶。如有來者。荏油覓付。薏苡亦望料理。生涯所用。可笑可笑。

松齋先生文集卷之二

<復答安求禮書 己卯>

遠委問贐。開牘拭涕。亦復何言。比來之事尤慘。果誰怨尤。僕守命僅不死。終未知何如處也。凡人之事。能逃數與命與理也歟。當此之時。相問信亦可休也。餘難區區。只此。至月二七午松齋世事千萬。更不掛口可可。

花潭先生文集卷之二

<復朴頤正，朴君實帖>

病困。承問兼藥物。便覺醒蘇。僕。年前來氣衰。寒齋短褐。得寒疾固其所矣。乍寒乍熱乍汗。一日之中四五。不能飯月餘。殘軀虛竭。勢似不能久留。莫非天也。示服制。三月當除。不得一日引之也。五服。月數外不得加也。今國制。白衣冠終三年。已立法矣。除正服後著白衣冠可矣。時先生持靖陵喪服。依禮制。僕。幸保得到花潭。可一枉。敬德。復。

花潭先生文集卷之二

<復朴頤正帖>

戀承書問。蘇慰蘇慰。僕。爲暑濕所困。氣蘇健未也。示何異之言。似乎過。是未過也。仁人孝子之有深愛於其親者。行見皤然之耄老。其中怵焉憫如也。知吾子推老之心。其亦有及於朋友也。僕。年來兩鬢素颯。氣力衰遲。住得人間。閱幾歲月乎。春經大病之餘。困憊尤深。爲其友者。可不憂之耶。僕。乘秋涼當寓潭舍。然無寓客處。舍弟未能別構屋。所收材皆不可用。勢未能別構也。冀玉攝自重。乙巳六月十六日。敬德。復。

泛虛亭集卷之五

<答李生>

聞好樣侍側。爲慰。奴輩燔瓦時燒木。專恃公等之扶。公等若盡心相扶。吾豈敢忘其恩。吾亦秋來。欲下去爾。姑不具。

三日。起夫。

泛虛亭集卷之五

<答李座首>

知悉書意。改號事。予何小忘。今判書前早先白之。而迄未舉行。柰何。今之勢與昔不同者。宰相私情勿爲事有傳教也。汝不知朝廷間事體否。輒盡情言之。吾心豈安。姑遲天命爲佳。不

一。病夫。齒痛草。

德陽遺稿補遺

<答安順之書> 出安順之家己卯諸賢簡帖

自春分手。暨未聞氣候何如。懷戀殊苦。今得委札。悉天只之平復及君之康吉。喜慰。洛中。依舊無事。諸友及僕。竝無恙已。且近思錄垂畢。可喜。所求跃尾。當囑元冲公。隨其製之早晚而送之。來簡已示大柔。金綵使之起草。讓于元冲而不爲。未知元冲公復以爲何如也。僕歸觀臨發。又遷他官。不可遽爲發行。憫憫。邊山之約。青春已過。空悵望奈何。人事遷緣。不得自由。每每如是。可嘆。如獲下歸。當喻之。謹拜復。正德十四年四月十一日。

俛仰續集卷之二

<與李叔獻書>

卽今令候何如。仰戀無已。頃蒙李景浩過訪。仍言曾見令公活計不饒。此固柳子厚所謂士之常也。僕以加土陳疏。蒙恩受由而來。方患勞熱。近少調理。下歸海鄉。切欲一奉清儀。路頗迂遠。深以爲恨。下來時因洪君石壁。聞松齋老兄格物無極之釋。快從令公之說。深歎其德學之日新。令公之所言。卽某之所見。雲披日出。不謀而同。欣幸無已。羅松齋答書。乞卽謄送。深望深望。以令公之資。投閒得暇。廣覽載籍。其爲長進。豈可量乎。僕衰暮之年。上熱下冷。急於調氣。未遑考索。謹以管城一柄。仰助草玄之資。伏惟令照。

俛仰續集卷之二

<答柳眉巖書> 丁未九月初二日

賢胤仁(伯)聯袂見訪。此實山谷中稀有盛事。仍拜垂札。似若以老漢爲粗有見識者。猥與之往復論難。此尤非淺陋之所敢當者。不勝赧渥也。近自歎虛棄八十光陰。深得罪於聖賢遺訓也。加以世道不幸。黨禍大起。無狀姓名。屢出於章疏間。跼高蹐厚。不知何稅之地也。蓋彼此相激。駟不及舌。而一隊人銜口而出者。皆歸之老殘垂死之身。其在軟地。雖不敢辭而內自循省。亦豈無自招者耶。餘萬幸甚幸甚。只祝道體萬重。

潛庵先生逸稿卷之四

<與李大年> 壽苓○壬辰

往年。上東門外一別。迄今耿耿于中。謹問庚炎。侍彩萬衛。學味超佳。千里片心。如水注東。世弟叨蒙異數。仄跡花甌。悚惶罔知。頃拜從氏兄。細扣邇來清韻。令人。有追友江南之志也。去秋。哭士衡。今春。喪卓甫。吾儕同志。次第凋謝。惟從氏與大年及公直在。而何時團圓吐懷。如昔年芹洞會也。近聞尊座。選入桂坊。竊趾緣此。握敘竟孤。遠望恨恨。

武陵雜稿卷之八 拾遺

<答張豐基應璇>

伏叨存翰。兼領別惠果膏至珍之味。深荷舊眷不弛也。違奉多年。披雪何時。病中愈覺停雲戀苦。似聞雲洞諸生。藏修相踵想自此春暄省耕之餘。閒臨竹溪。漱綠水以歸。其興如何。每蕭然夢小白舊遊。不知此身猶臥終南之下。伏惟尊照。謹拜謝。

武陵雜稿卷之八 拾遺

<寄姪非熊>

聞汝懶學。心如吞惡物。汝度汝力。足以彎弓乎。汝度汝才。雖非學問。而可取功名乎。伯氏業武。未伸厥志而卒。九泉之下。亦不忘汝。汝不勤學。欲爲何物。汝若從我言則人也。不從我言則獸也。汝將何擇。我雖無似。告汝之言則不敢欺也。嗟乎汝乎。汝豈知我慟之入骨髓也。汝欲從閭里常人小兒之習。不從我窮天之懇則地下伯氏之心。汝將何以慰之。爾毋忘我言。此言卽伯氏之意也。我實負汝耶。汝實負我耶。欲行千里。一步最要。汝其進進毋退。前此累以書遺汝。汝不惕然動念。涕泣篤學。吾誠不足。不能動汝。

龍門先生集卷之五

<答成聽松書> 乙卯九月二十六日

積年阻拜。常切景慕。不意忽捧手字。如聆雅言。慰仰不自己。豈以無狀。不能揣分。強顏從仕。福過災生。季兒病死纔月餘。舍兄繼逝。慘慟之極。又值倭變。奔走戎馬間。自靈巖移赴他鎮。途中輒發舊疾。顛倒馳還于家。苟保殘質。忝辱朝命甚矣。何以自贖。來伏龍門田舍。僅僅度日。既賜存問。又求鄙作。深荷雅意之辱也。頃於在京時。再往宿李孝先江亭。乘秋晚約偕訪高居。各緣事故。未遂下誠。恨如之何。又期以明春。未知人事竟如意否也。四言二首。重違書呈。仰希一笑。餘祝保重萬安。謹拜以謝。

龍門先生集卷之五

<寄書室書> 丙辰二月晦日

無往來人。未審京家與齋消息。遙慮春事已晚。久滯旅次。今到黃州。欲歷安岳，海州，延安而去。新庵所造材木及椽。已輸否。須力圖爲可。三月望時上京定計耳。

退溪先生文集卷之十五

<答李公幹> 己未

人還。獲承垂報。知去臺務作庾隱。是亦宦路一滋味。想今竹窓清風。高臥盤礴。不羨羲皇上人。馳賀馳賀。滉病朝廷已知其深劇。伏謂初辭可以得解。而有旨如此。又聞物議多有異同。不勝悶迫之至。不得已再上辭狀。欲速則恐以太速爲非。欲徐則又恐以太慢爲罪。持兩端日夕惕厲。奈何。遷陵一事。不知緣何有之。承聞以來。身不帖床。仰深煎燭。汾川皆安。大用亦來。近以病未得數相還往。是爲恨耳。邈無晤對之期。惟珍愛萬萬。

退溪先生續集卷之五

<答趙士敬> 乙丑

奉問慰慰。國恤遽出不意。驚痛之中。又慮上體如何。憂悶不可言。禮云。以文書到日哭臨。其後第六日成服。然則儒生諸人變服。亦當以是爲准。但此中。因安東所報。十二日已聞之。而文書到縣。在昨日。若從昨計則太緩未安。故只從十二計之。十七日當成服。以製服事。今刻入溪上耳。十七朝。出山舍成服。來則可敘近懷。

退溪先生文集卷之十五

<答李大成>

阻音承慰。霈恩蕩雪。普徧存沒。而家兄亦在其中。九泉之下。未知知與不知。悲慟之極。無以勝堪。無以勝堪。公幹令公得丹陽。可喜。但聞殘弊特甚。不知何術可捄。反深憂慮。僕日覺昏憊。怯寒於未寒之前。兀坐送日。以是成此阻闊。可歎。

退溪先生續集卷之五

<與趙士敬>

近況何如。滉初四日。始拜承有旨書狀。諭許遞職。可遂退閒。聖恩如天。何以上報。只有收拾桑榆。少免罪過。此一事可庶幾耳。而病昏至此。何能如意耶。近日。加以眼疾。不能看書。尤恨。心經，禮記送去。心經既標題不善。未免貼紙改題亦未善。可笑。

守庵先生遺稿卷之二

<答成同知書三首>

伏蒙賜書。重以厚貺。拜奉以還。感懼交并。無以措躬。既審剛決有浩然之志。將如蒼生之望何。小生老謬無狀。過七望八。命在朝夕。自念無復以瞻望清光。恨恨如何可言。所惠華牋升番。玄玉一挺。祇領謹藏。永以爲珍耳。且精神憤憤。臨書輒忘所言。惶恐無已。伏惟令鑑。不備。謹拜上謝狀。庚寅四月二十七日。朴枝華。頓首。

南冥先生集卷之二

<與申松溪書>

近闕相問。不認氣味何如。阻懷難道矣。僕則雖幸不死。坐作亡家之物。恒不如死之久矣。母病猶未絕。妻病侵尋。血泣終宵。雖欲奮身遠走而未得。欲奉君侯恒切而恒未果焉。事事真堪痛也。拘繫至此。不棲山莊。已出歲矣。何人相弑。何地弛懷耶。件件緒思。誠不可說盡矣。姑問尊履何如。謹白。十四。植。

南冥先生集卷之二

<與申松溪書>

邇來。連獲垂問。想氣味康好。深慰深慰。兒病爲日苦久。一俟司命者處分。老母前患瘡證。往來未絕。僕之頭病。隨日侵加。一家終歲所業。此外無他矣。惠來紅圓。子無以爲謝。每逢君候發藥居多。外病與內病。俱未除去。良可嘆也。思欲由八溪路旋自鳳城歸來。歷叙阻懷。若母子之疾。如前不已。勢當直返。然更謀一番會事。常居海濱。未有苴裹之獻。愧恨愧恨。謹謝。念五。植。

與李叅奉榮世書戊午

朴谷集

地北天南音問杳然回首歸雲夢魂徒勤卽惟
酷熱兄履萬相慰迺交至元祿千里馱病無擾
幸矣官閒晝靜調養得矣而才弱任重懼切覆
餗恐負拔擢之恩日夜兢惶家姪承宣之除又
出此際妙年頂玉今昔之所榮而盛滿至此招
損必至以榮爲懼不得不凜凜耳居諸不畱季
父初暮已迫而人事變遷翊姪又天遙想哀從
心事實不忍爲懷也

朴谷文集卷之一

六

與都景寬爾高書

三霜已過墓幕遽撤制禮固不敢過者也追惟
先誼悲遡之情迨常不忌於肚裏也家伯宿謬
比至快復而西旆以秋間經紀耳鑑湖水月正
如舊時遊賞積蟄之餘一舉暢叙亦足爲養性
之資從近枉顧以攄情至之懷如何如何

松川先生遺集卷之四

<又答眉巖>

竊聞。祇承榮召。卜日西邁。平昔慕嚮之抱。實非有後於人。則乃於優閑之時。一未克造詣屏下。仰沐清風。小解孤鄙之惑。興言及此。展轉無已。且自前月來。疢作隔日。加之暑症沈綿。候拜路左。瞻送行塵。願亦難諧。益切私惋。伏惟尊鑑。所祝。餘炎軒蓋萬福。朝夕論思。扶持元氣云云。

松川先生遺集卷之四

<答柳眉巖>希春

曾已仰審令體久勞康莊。暫憩空谷。馳展下禮。願言莫遂。伏蒙令翰先勤。眷意多方。環顧無堪。祇深感激。膚末。豈有根本。每於理致難索之處。竊想令學爲一代之宗。則常切輕千里而趨拜之悰。其間縱不免爲蒙輩論釋。實未穩當。亦未克卒業。擬待開春和煦。抱其所疑。就質于高明之下。庶或厚德通其塞而撥其蔽也。自幸之甚。乙亥十月二十九日

德溪先生文集卷之六

書書簡散失殆盡。而陶山往復十八張。亦遭火於蘆谷。

<上南冥先生書>

伏承兩度玉緘。來自山陰。乃臘月初五。二十三書也。一時捧披。仍審德履愆攝。常患眩痛。驚慮不已。健自前冬。濕痰沈重。塞喉盈胸。盡氣歐唾而後得通。腰胸間。又有痰核往來。或堅或虛。今加咳嗽喘急。閉臥旬餘。日漸疲薾。憫仰憫仰。歸意果決。挈去頗艱。逡巡到此。又得此疾。良自慨歎。天時人事。尚復何言。養病於土床。乃今日之得計也。

德溪先生文集卷之六

<與林葛川書名薰>

獻歲發春。想惟新禧益茂。遙賀萬萬。生添齒以來。眩暈增劇。無稍平時節。亦衰境常理。奈何。只以離索相遠。無便奉話。常爲耿耿耳。今者縣城主在喪。適因下人往。聊達鄙情。

德溪先生文集卷之六

<與盧玉溪_{子膺}書>

昨蒙賜枉。感極感極。茲者令侍履如何。慕仰不已。且中聞都進士捐世。驚痛來此。其家已經病氣。雖不入哭。而在外治護爲計。孤窮之喪。斂殯甚艱。凡事幸蒙扶護。且命給軍人。使之助役。以治草土。千萬至仰。

介庵先生文集上

<答吳德溪_{子強}書>

前者。德星光臨窮谷。穩承良晤於久睽之餘。仍獲叩迷疑於大君子之前。感荷感荷。春和景明。伏惟味道有相。翼。俛然軀殼。幸獲依舊。而家兒患河魚未效。舐犢之私。自不禁五倫之無寐。甚矣難制者情也。所詢延平問答。翼亦有疑於其間。何敢率爾。但厚意不可孤。謹一二箋解如左。豈敢自以爲是乎。欲俟鍼石之功而庶幾有悟耳。竊聞將往陶山。當飲河滿腹而歸。令人欽歎無已。不宣。翼拜。

月川先生文集卷之三

<與權定甫>_字

不鄙。每貽眷問。極荷極荷。拙近保無他。除命已斷置。但既已妄出。又至三辭。臣子之義。甚似未安。而衰病昏耗。他無善處道理。只得如此耳。所示參同契。若欲一試。不須送還也。行狀事。僕素無識見。何敢妄議。但唐李文公之言曰。凡人事跡。非大善大惡。則衆人無由知也。故舊例皆訪問於人。又取行狀以爲據。今之作行狀者。非其門生。卽其故吏云云。而不論職之高下。且考諸朱子大全。則延平先生不仕。而朱子作之。南嶽處士吳晦叔翌。以處士而朱子作之。則古人亦不必以官職之有無而爲之也。幸更察之。但此等文字。下手甚難。言之輕重。自有尺度。想在藻鑑。不縷謹復。

思菴先生文集卷之四

<答鄭雲龍書>

省書。審雅況清穩。慰豁無已。玉溪翁奄至殄喪。國家之不幸。摧痛罔涯。季真公亦繼喪逝。邇來世運之屯。難可形容。病物獨留人間。俛俛奈何。加以疾病支離。日退無進。無足道也。惟望高明。勉勵不輟。以扶吾道。北村之亭。今才草就。至如修粧。當隨力而爲之。君亦留念。殊謝。

栢潭先生文集卷之八

<與趙士敬琴聞遠書>

別懷悠悠。思想曷已。天旱一至於此。山林草木。亦爲飢民所剝。物有非常之性。亦有非常之禍。可慨也。秀卿以會期有簡。連床討懷。在此時也。姑不能一一。

栢潭先生文集卷之八

<答趙士敬書>

想左右不意佩符。村野民情。固已覩徹髓髓。牛刀之割。必自恢恢矣。猶願務喜人規。裁長短而取舍之。則是尤爲盛政之所助。不啻如塵芥之於河岳也。姑略布此。更冀春寒。將理民事。益衍冲勝。

竹川先生文集卷之三

<答白誠之>承宗

洛下相分。迨今悵缺。不意承惠書。謹審節祀返驅云。自不覺赫然。矧得客履連得康吉者乎。老拙自洛歸時。轉向嶺南。中路困憊之狀。不可形不可形。家兒第一。海南尹友家有喪變。故出去者今至七八日。第二。出做于甲寺。故未得修答耳。所送紙本。深感深感。令阮丈前。忙未修書。此意仰告焉。餘期在於何邊耶。當一進敘矣。

藥圃先生文集卷之二

<與兵曹判書>

歲序既換。春節且深。不審令動止安否。卽今如何。近因郵吏所報。得審令公。又長騎省。摠理機務。必能倍殫心力。詰戎講武。大振國勢。不勝慶賀之至。唯冀令體爲時特加珍重。以延國家無疆之福。切切幸幸。生。苟存性命。第老病日甚。人事自絕。已無可言。無以更瞻天日之光。只自悲感而已。不審洛下風色。如何。南北邊報。別無警急耶。適因歸便。憑候令況。餘萬悠悠。書不能盡。

藥圃先生文集卷之二

<答宋德久>

聯見手書。慰濯無量。乃今新暑雅況。安否何如。唯祈勉加保攝。生。尚今苟度。海寇已於本月十日。撤兵過海。自此中外庶得息肩。中興大業。亦可因茲辦出。天幸曷喻。待秋。省墓爲計已熟。如或得遂。則與君暢敘。亦可圖成。幸不可言。清風呈似。幸領之。

高峯先生續集卷之二

<答柳眉巖書>

謹伏承令問。仍審令候佳福。仰慰。大升蒙令賜。僅得免死。但疏慵之性。與世不諧。而病又逮之。茲不得入洛。恨仰。所望令勤聖學。以爲啓沃光贊。宗社生民無窮之計。至祝。且中令惠管城。感刻無已。但未有所以仰謝者。愧仄亦深。餘不備。伏惟。

雪月堂先生文集卷之三

<與李企菴完丈>

近來不審尊體起居何如。瞻仰不已。再惠瓊韻。效顰已久而不呈。今茲改書前和。謹上。笑領如何。欲於來初。陪會蘇蘿松亭。採山爲羞。臨溪洗酌。以寓浴沂風雩之興。并惟下諒。

雪月堂先生文集卷之三

<答子玲>

前月人還。見汝書。知往學垓姪廬所。喜喜。所讀書至幾許卷耶。必須立志牢固。隨處敬謹。勿事輕浮放浪。辦得儒家大事業。是余千萬之望也。聞赴榮川考講。利否如何。欲令汝下來。而恐汝畏熱。又恐徒費光陰於道塗。故不欲強汝之來耳。秋期只隔數月。吾之入室。汝之候門。亦不遠。猶以是爲慰。小學集說入箱。考出以見爲可。不知此。不足爲人。勉之勉之。

牛溪先生集卷之五

<與李大諫海壽書>_{壬辰}

伏問起居何如。仰戀仰戀。渾。得病深閉。不聞外事。今因人聞所啓蒙允。未知果然否。今日之事。非高識沈慮。不足以濟事。切欲往拜座下。極陳鄙見。而病不能出。可悶。倘蒙令公左顧鄙棲。則可以輸寫心肝矣。至祝至祝。此外莫動一毫言論。唯以鎮靜保合爲急。則庶救得一半矣。垂死殘生。老婆心切。家國兩亡之秋。豈得默默而已耶。伏惟心照。

牛溪先生集卷之五

<答李大司成海壽書>_{癸巳十二月}

瞻慕恒深。伏因朴天瑞。奉承手札之賜。恭審比日起居萬安。感慰無任。且蒙下示松江之訃。不覺失聲。設位而哭。哭之長慟。渾。恒疾不死。久生於世。常恐逆理。今而又送松江在先。謂之何哉。浮生脩短。同歸於盡。只是早晚事耳。而逝者甚好。只留生者苦耳。長羨長羨。渾。月初傷寒。迄今未復。漸愒方深。可苦可苦。伏惟令鑑。謹奉狀不宣。

栗谷先生全書卷之十二

<答鄭季涵>_{壬午}

連承手字。感慰千萬。令履珍勝。幸甚。珥眩疾彌留。纔釋吏部。又忝刑官。悶不可喻。示事權遇之獄。雖不快。何至以此輕爲去就乎。方講求救民之策。似難中止。若條陳民瘼。而自上泛然不肯嘉納。則方可去矣。竊觀天時人事。恐無進步之望。然父母之病雖革。豈有不用藥之理。第盡吾誠而已。

栗谷先生全書卷之十二

<與李景魯>_{希叅}

久絕音信。無乃已折桂枝耶。戀想可言。珥保閒江閣。別無疾恙。良荷腆念。來月之初。欲向首陽。其前幸可枉話否。鵝溪聞已上來。必被引見。所啓之言幸細聞錄示何如。流芳遺臭。決于一言。爲親舊者憂念。爲如何哉。

栗谷先生全書卷之十二

〈與李夢應〉濟臣○癸未

春寒。伏惟令履安穩否。戀仰戀仰。邊報甚急。而如珥腐儒主兵。未能出策。可歎。流聞道路之言。則令威太嚴。將士知畏而不知愛云。信然否。主將得士之歡心。然後可得其力。願令公威行而濟之以寬仁也。京兵調發。事勢極難。願令鈔道內裸色軍應敵也。

藥圃先生遺藁卷之六

〈與栗谷書〉

聞公得蒙允命。不勝缺然。昨與今日。擬拜屏下。聞公出駕。中途而返。隔年之懷。末由一開。此中悵惘如何。吾家在大平館前。明若發行。暫歷臨。深企深企。謹拜不宣。

松江續集卷之二

<與海翁書> 海翁 似是魯翁。庚寅十月二日。

間絕信息。令人盱想轉苦。卽此初寒。體況何似。馳溯之至。澈一年鞫獄。精力已盡。加以舊疴新症。交來作祟。可閔可閔。每聞歸便。輒上一牘。而來書責以久不問。未知吾書落何邊耶。怪怪。曾上藥物。一一照未。如有新服之藥。勿惜相示。清香時未得。從當覓上。伏希清亮。謹上狀以問。

松江續集卷之二

<與趙重峯憲書>

生還忍見今日事。朝衣拭淚。淚盡血繼。聞公倡義起兵。爲之向風歆歎。第未知往在何處。用武利鈍如何。僕受命。將前赴貴道。凡屬大小軍機。切欲急速面議。何以得之。幸須量示。諸京列邑。爲賊窟穴。兵力單弱。掃蕩無期。奈何奈何。貴道受兵幾邑。完全幾邑。清州之賊。盛衰如何。竝示之。餘不一。謹狀。萬曆壬辰八月念一。澈在白沙汀阻風。

玉峯別集

玉峯集後序三之下

<寄亨南書>

近來爲度如何。所讀幾何。爲慮。父自咸山。昨日始還此。無事往來耳。今欲就敍使君。而祭日不遠。故不果。過祭卽進爲意。汝若於其處。不廢日讀。不須來此。倘漫浪過晷。明曉馳來。父子相對。猶爲愈也。海南問安人歸。須使來奉家書而去爲妙。馬粥粟。告覓而送何如。縣近病氣大熾云。然則當速來此可可。廣文前修簡而去。傳達。餘不具。

藥圃先生遺藁卷之六

<與牛溪書>

伏問起居若何。瞻慕無已。某蒙賜粗遣。但患瘡未瘳。迄未躬進。無使喚。久闕伉候。罪恨罪恨。日氣漸沍。山寒必倍。未審何以將攝。仰慮亦深。伏惟下鑑。謹奉狀不宣。至月十二日。因聖旨。東宮來廿四日間。動駕云。

鶴峯先生文集續集卷之四

<與金惇敘>_{丙子}

奉別之後。一向無便。忽承至月中所付書。始審行李多福。實慰遠思。家書深荷卽傳。多謝多謝。前患落傷處。已得痊可否。觸冒風雪。恐至有愆。瞻慮不置也。先生請諡事。曲折甚多。慎仲丈備知首末。故不復縷縷。緣此議論紛起。幸與逢原十分商量裁處。勿令有悔也。誠一乞縣之計已左。又忝匪據之選。此身狼狽。不可言也。奈何奈何。

鶴峯先生文集續集卷之四

<與金惇敘>_{癸未}

謹承尊翰。足當一面。且想日對伯兄。消遣客愁。我獨何人。不得致身於風雨牀前。以慰鴿原雲樹之思耶。流歲已盡。此時懷惡。尤不可言也。前示瓊什。卽當和上。而服中悲痛之餘。無暇及此。想恕亮此意耳。

栢谷先生集卷之三

<與鄭士誠，士慎。>

曩承辱報。慰感交深。卽日秋涼。伏惟伯叔共被。僉履萬福。此處旱蝗風相繼爲災。賑救之難。將有甚於既往。豈非按節非人。有所感召而然耶。夙夜憂懼。罔知攸濟。所示石罐謹呈。製造匪精。恐不合用。藥村當繼之。崑壽脚膝生瘡幾月。而有加無減。實惟過分所致。辛苦難支悶悶。伏惟僉諒。只祝寢膳加衛。

栢巖先生文集卷之六

<與權章仲> 好文○庚辰

伏問靜況。邇來如何。玆中秋至家。病故稠擾。尙闕候問。愧罪無已。每欲一騎馳造。從容侍話於青城。而慈病之痼。已三年矣。侍藥之餘。或從官事忽忽。日月多在道路。賤疾以此尤重。雖得少暇。尙未果願。一生迷路。良可浩歎。每想執事閒養有素。真有所得。而竊意居靜之功。無乃太多邪。伏惟雅諒。

晚全先生文集卷之二

<答洪判官林堂君遇書>

病餘汨沒。忽得惠書。開緘奉玩。不覺心醒眼明。不啻款晤承誨。慰感良深。生衰病添齒碌碌。頽波之中。不得自振拔。愧歎而已。開月。決意歸省松楸。從容相接。必在此時。惟是之望耳。銀獄未了。劇仕無閑。氣甚困。不能盡所懷。

東岡先生文集卷之十六

<答李善述>_承

謹奉示書。得審冬寒。孝候支勝。仰慰無已。宇顒僅支病憊。佗無足道。時事至此。病敗百出。信非人力可及。目今南寇變詐。尚未可測。而關西老酋聲息又可畏。不知將何所稅駕也。退占一丘淨地之計。時未可定。而近欲受由。歸掃先塋。亦未知果遂否也。別紙所示。謹悉。但彼人多所知識。恐亦未必能除去耳。可慮可慮。

晚全先生文集卷之二

<與宋雲峯仲懷書>_{壬辰}

城東分袂之後。一向不聞動止。不意此身尚保殘命於亂離之日。復得賢兄平安消息。一喜一悲。誠不自勝也。目今未知安頓何地。一家眷愛。亦皆支撐得過耶。前日間關之中。妻父母賴兄指導保護。得免大段狼狽。來寓海濱農幕。何幸如之。僕流離輾轉。八月初。艱到唐城。痛念報效之無路。與一二同志。召募鄉兵。圖報君父之讐。而力綿材薄。不如意事不啻十八九。痛哭奈何。若以人事觀之。天意似未可回。所望祖宗在天之靈。有以默佑於冥冥之中。復見漢官威儀耳。言之痛心。不如無生。

東岡先生文集卷之十六

<與李儀甫璣玉>

阻久仰慰。僕僅支。但昨聞倭賊近逼京城。前月晦日。主上遷幸西京。二王子出來安邊。不勝驚慟。豈意國破家亡。乃在目前。痛哭痛哭。自是下三道皆在賊中矣。興復之策。誰其主之。落此塞外。絕不聞彼間形勢。心如沸湯。柰何。此地與異類爲隣。此等奇。當千萬秘密。不可喧傳也。

重峯先生文集卷之九

<與吳生>同日

頃日之奉。各有斯文之慟。未克穩叙阻鬱之懷。歸來數日。切不勝忡悵。此日陰寒。未審區治襄事。氣況如何。憲比患荊布疾篤。末由往董一役。平生罪恨。此中姻翁有季女甚賢。聞公賢季獨抱遠器。謂憲有交游之雅。使之通情。是乃師長平日所勸之事也。公須稟議于親庭。如以爲可。則書示五條如何。朴有七十老親。欲以歲前成親。方求篤志君子。如得與賢季相聚。拙者之幸也。豚息之幸也。幸惟恕照。謹奉狀。

西厓先生文集卷之十一

<答琴聞遠蘭秀>○戊戌

去歲南歸。往來於鳳城近地。非不欲一造溪院。以訪舊日遊跡。兼與諸公一敘。而戎馬怱怱。歸程又被嚴旨。無須臾之間。悵望未遂而來。尋常愧歎。但切懸情。今兒子之來。忽奉辱翰。如得奉晤。感慰兼極。生以菲才瑣力。當此危難之際。久冒非据。不自引退。遂致人鬼交怒。謗毀鑠骨。今方屏伏郊外。以俟誅譴之命。慚負公私。有累師門。柰何柰何。無緣相遇。一道此懷。惟此一書。便爲永訣耳。月川丈亦當一書相問。而區區鄙意。似未見悉於前日。故今亦慚愧不敢。望須傳告此意何如。羈危道中。燈下草復。言不悉意。

西厓先生文集卷之十一

<答金昌遠>

投簪之計。不妨少遲。觀勢處之也。此間粗保。昨日往玉淵一宿。江月清甚。菊花滿庭。亦自不惡。恨心源未甚淨滌爾。來詩謹悉。三復起懷。今日所當爲事。惟當杜門卻掃。使形跡昧昧。爲第一義。而往往頗爲外人來鬧。戒力不固。始知古人土室十五年。惟此一段事。亦難及耳。碣文之托。盛意勤至若此。豈敢有辭。但終恐不合於事爾。行當細量更告耳。

李忠武公全書卷之一

<上某叔書>

頃聞氣候違和。仰慮罔已。今則已見勿藥之喜耶。姪伏荷下賜。無事供劇。母親所患。或作或撤。久不得見差。伏悶伏悶。前稟藥材。隨所有下惠伏望。洛中。胡差入城。胡將能巨里。領一萬兵。以田獵事號稱。來在義州越邊九連城。賊謀難測極可慮也。適聞有便。憑候起居。

芝軒先生文集卷之二

<上退溪先生書>

久不承動靜。瞻慕亡已。冬寒陡嚴。伏未審道體頤養如何。伏聞與一二諸賢。近住陶舍。從容講研之樂。想日有佳趣矣。士誠拘牽俗累。未能擺脫。獨學寡聞。虛度歲月。恐如此而孤負教育之恩耳。冬間。欲俟間隙。更爲趨侍教席之下。而但親意只此歲裏。溫習舊業。爲開春參試之計。似當過後爲去住之決。媿罪益深。未間。惟祝氣力毖重。

芝山先生文集卷之二

<答朴大庵>

遡慕方勤。獲奉存翰。想道履漸佳。稍進食飲。足慰瞻仰之懷。好益比前似歇。第未克快脫。此衰年所懼者也。春間。本欲鞭羸一進。以候起居。退極山林之趣。但所苦未快。茲爲前却耳。承惠魚腊。極知相念。僕安可以口腹。每累安邑耶。愧謝不已。愛攝千萬。

龍潭先生文集卷之四

<答河元龍應圖>

謹承情問。得審尊履萬福。感慰無量。章居官既寒。旅寓亦寒。皆是一樣寒涼之味。雖曰寒者士之常。寒既太甚。不亦苦乎。兄則雖乏果腹之資。有溫突足以忘飢。比諸鄙人凜凜無所定居則亦足多矣。可笑。阻拜數月。切擬作速敘闊。若待日暖風和則不亦遠乎。近欲往拜權丈。兼邀尊兄。更究儀節中前者未協底意。可做一場好會。兄不可以每托疾病也。

旅軒先生續集卷之二

<與張斯舉>光翰

拙行昨午。始返元堂。卽問數日之況如何。相見之日。亦不能從容。別來殊悵。幸待事閒。一來穩晤如何。且祝處鄉處族。務須寬弘整恪。寬弘則人自愛。整恪則人自恭。能守此四字而不失。則无妄之來。不足爲吾害矣。更須爲我珍信也。我亦欲過夏于不知巖茅舍。我未往之前。君須一來也。金烏之遊若作。則委通是計。

黔澗先生文集卷之二

<與金而靜>

隔歲阻信。常切懸想。頃得便風。乃吾賢友金士悅訃也。痛哭何言。當日過門時留詩敘別。有海南真萬里。誰謂是吾鄉之句。三復愛玩。以不獲見面爲恨。豈料此別遽隔幽明也耶。尤增慟怛。平生信實。吾輩中甚不易得。想左右從遊失此強輔。益復何以爲懷耶。僕。落在一涯。家鄉杳然。官儲且竭。倍費心力。昨得西報。有山戎隳突之漸。聞來益覺茫然。

黔澗先生文集卷之二

<與孫季進>

一別十載。信息亦阻。區區懸邇。豈有涯極。千萬意表。忽奉手滋。就審炎熱。尊字履支勝。慰豁且感。靖。衰病日甚。加以家內喪憂層疊。長在摧咽中。奈何奈何。每念尊兄剛褊。無異於鄙生。屢聞以賦役均施不暇寬貸之故。見過於土豪。咨謗騰播。心切奉慮。僕之在湖邑。未免此厄。常爲狼狽矣。幸賴知舊之力。前春遞還。私切感幸。丹之爲邑。素稱凋弊。遠想尊兄酬應號令之際。必多憂惱之苦。奉慮不已。切仰寬猛隨便。不失下情。如何如何。

雲川先生文集卷之三

<答黃混元>

思人一念。與春草爭長。尺書專俾而至。足當對面目開心肝。蘇浣蘇浣。橋門觀聽。一時盛事。群賢莫不出頭角相慶。而足下獨不起。無乃見小敵怯者邪。抑亦有超然見大意。不自汲汲於進取邪。二者必已知所守矣。深偉深偉。如涌者。家有病親。無意外事。況非其才者乎。足下知我而反以不知者之言言之。深愧素許之不厚也。幸賜心誨。勿謂面交。至祝至祝。便忙不究。

滄浪先生文集卷之三

<與尹明叔_燧書>

阻久拜暫。曷展衷曲。歸來耿耿無已。卽惟雪寒。侍候佳勝。瞻邇益切。其日因久鬱。肆意極言。肝膽盡露。追思愧汗。然此事要不可與俗人道。所以瘖舌餘紀。而今始發之於吾兄者。恃有以知我。想未怪也。只願兄自會而已。慎毋向人道也。至懇至懇。諸公回文事。無乃非時。幸更商量而動。毋爲易易也。近報如何。亦願略示其概。

秋浦先生集卷之二

<與安明遠書>

冬寒漸繁。未委侍況何似。馳遡極悠悠。生所患臍腹之痛。一向沈痼。窮鄉無藥物。雖遠求於京醫。而往返之際。前症已變。以此治病。不亦難乎。觀今證勢。少吉多凶。亦復任之而已。念我與君。不啻同胞。常願白首不相離。而衰暮有此分携。恐一朝溘然。不得復握手。而遂成長訣也。惟祝珍重。

晦翁垂死。有書寄項安世。欲爲君誦之而憊甚。姑此。

秋浦先生集卷之二

<答金子范友淹書>

生之還洛。君已下鄉。巧違不相見。方以爲恨。茲承侔札。仍悉靜況如宜。爲慰不淺。生萬里歸來。幸免疾恙。卽蒙恩典。出於分外。兢惶踴躍。不知所出耳。白江舊棲。長入夢想。而國祥已迫。冊使將臨。勢難決去。奈何奈何。清香一封呈上。莞入爲幸。餘祝新年進學受祉。

沙西先生文集卷之四

<答康明甫>_{甲子}

湜拜。私家不幸。室人奄忽棄世。痛苦摧悼。不自堪勝。伏蒙尊慈特賜慰問。其爲哀感。但切下懷。季春初暄。伏惟起居萬福。第審受困於兩使。勢甚狼狽。極可貢慮。而此時似非棄官之時。唯聽上司處置。一任其進退而已。何可輕先動搖。以爲關念之地耶。望須平心以俟。甚善甚善。叔平雖入言地。想難發言而善處矣。湜臨亂憂勞。須髮盡白。又遭罔極悲慟。將不得支持此身。此亦私家一大憫也。伏惟盛諒。

愚伏先生文集卷之十

<與李叔載>

閉戶靜坐。與玉樹相對。不知門外春風捲地。其樂如何。健羨健羨。生非不知容膝之易安。而每親朋來。有妨鼎坐。近欲撥貧營小屋。以便迎接。百事皆難。鳩拙可嘆。

月沙先生別集卷之五

<與金沙溪>五月十九日

陞辭之時。病告不得摻別於江上。白駒難繫。徽範日遠。暮境分離。懷抱甚惡。旱炎比極。不審途間行李還宅。動定何如。慕用之誠。不弛于中。侍生病不離身。而不免扶曳復出。時事日復艱危。憤憤隨行。無所猷爲。自咄自咄。適因家奴以推捉逃婢往本縣。憑候起居。

月沙先生別集卷之五

<與金沙溪>九月二十日

秋序已闌。伏惟道體神相。區區瞻慕之懷。與日俱積。侍生衰病日深。供世無力。入寒來。舊患眩症復劇。今方上章乞免。伏枕呻吟痛耳。召命屢下。加額久矣。而旅寓寒苦。非老人所堪。固不敢望矣。會合難期。東望悵悵。卽聞舍人之去。附候起居。

清陰先生集卷之四十

<寄張善澂>壬午

老人疾病日加。今日不如昨日。日以困劣。伏枕終日。奄奄待盡。奈何奈何。先集敍文。誼不可終辭。強起草勑。精力衰削。神思荒落。況可示諸後人耶。世俗狹陋。凡於此等文字。既求而致之。則進攘之際。難於裁決。或隱忍不去。往往有污佛首之譏。惟爾與我。毋拘此嫌可也。千萬照商。有疑見示亦佳。

清陰先生集卷之四十

<與宋英甫>名時烈○乙酉

昔者行李。迂路遠訪。甚慰平日嚮往之懷。祇以老病昏霧。不得穩討爲歉。茲於李生來。獲奉問札。悅若再接清論。感荷益深。第縷縷見屬之語。殊非所用於老拙者。媿忝靡容。僕經夏積損。入秋未甦。懍懍餘喘。飾巾待期。此後良覲。思之杳然。只冀侍奉學履。對時增茂。庸副遠係。目病潦草。

畏齋先生文集卷之一

<與趙任道書> 丙寅正月

昨荷枉臨。穩接英眄。感發良多。謝意不可言。風獐船路。未悉返旆何如。生近當返郵。長兒赴京則次兒新冠者。與長孫同學。而聞長孫近將就學于賢契云。望須次兒亦許教導如何。生之欲令兒輩受學賢契者。不但爲文而已。實冀有所警發於誨諭之地。更須母托。千萬仰懇之至。

敬堂先生文集卷之一

<答或人賀生男書>

忽奉手翰。副以佳篇。粲然奪目。吟詠以還。不覺謝感交至。僕六十有三。方爲人父。晚矣晚矣。而得受知舊之賀者。徒以世所罕有。在親舊尚且賀不容口。如老漢。作何如懷也。旣得賀書。又奉賀詩。難以筆謝。必待奉面申謝然後乃可也。

鶴湖先生文集卷之三

<答郭靜甫>

上年再見情翰。深感厚意。無以爲謝。十年前陳迹。每入夢想中。令人耿耿。想兄亦同此懷耶。進修齋中。觀物臺上。溪山風月。尚今依舊。吾輩昔年之遊。那得更續。已矣不見少年時事。浩歎而已。兄高臥山樊。日有觀書玩理之樂。課進村秀。斐然可觀。閒居事業。不爲不富。奉祖。顛汨塵埃。已成一箇村學究。少日零星收拾。今亦消歇已盡。每承來書勸勉。不覺赧然發駢。不知何時更資麗澤。以滌十年鄙吝也。不勝咄歎。

紫巖集卷之二

<與姜東萊 大遂 書>

伏承令書。就審令政體萬福。仰慰區區。僕於令兄。有宿緣。前者忠原。令春府爲交代。今此萊府。令兄爲交代。自愧無似何以得此交游也。幸甚幸甚。僕愚而固滯。作事憤憤。正合人言。豈有一毫可以告新令尹者乎。近來夷欲無厭。其所求索。極其太濫。而朝廷幾盡準許。日後難堪。勢所不免。惟在令兄處之恢恢耳。

隱峯全書卷三

<與浦渚趙相公翼> ○趙公時爲禮判。乙亥八月日。

秋涼伏惟令起居萬相。區區瞻慰。生衰病日深。就木不遠。未死前一奉。惟日望之。而京鄉隔絕。夢寐不到。奈如之何。然其嚮慕之誠。不敢自疏外於大君子。年前與楸相往復書。謹以別紙錄。呈。幸留心省察。且盡日垂竿俯碧流。魚貪芳餌。竟吞鉤。前魚登釣後魚進。閒倚苔磯笑未休此詩。生曾聞於人。不知誰氏所作。或云柳進士。而其名亦不傳。兄如有聞知。示及。今去梁砥南及朱上舍曄。同志之友也。聞兄與生相切。欲夤緣拜謁。命坐賜言。以代故人面目如何。

晚雲集卷之三

<寄砵兒> 甲戌八月

臨行慙慙。不能一語以送。此甚耿耿。汝若更不近酒云。無所可慮。須固志勿變。益戒杯觴。毋貽老父之念。凡係方伯之所命。亦勿固執。如或有大段不當處。則從容和顏色。論卞之。亦可。塞外遠客中。汝多病。十分慎惜。勿近女色。亦可也。奴僕須愛惜。善遇之。永興，德源書持去乎。關外早寒。好去之。

慎獨齋先生遺稿卷之七

<答宋英甫書> 丙戌七月二十八日

戀遡中得承手書。慰浣良多。曾聞還宅病暑。想已間矣。而又有他疾恙耶。深慮深慮。泰之頃日往觀數日。復來會。方通讀儀禮。恨不得與左右共之耳。日後若蒙來會。則當與泰之掃榻待之。啓蒙傳疑。謹受之。鎮岑昨已赴任。而其妻病甚。憫憫。餘不宣。

鶴沙先生文集卷之四

<答張司諫經叔> 應一

玉胤扣柴扉。仍披辱札。感慰何極。兄之一言。聳動瞻聆。雖不免怪鬼揶揄。而名高一世。身享清福。其視冥行妄作衆笑群詆者。不啻若黃鵠之與壤蟲。乃反歉然若有悔吝意思。此豈相愛間悃悃語耶。顧此老病。無由承一晤襲正氣。以爲革面自新之地。來教所謂愧憤羞辱等語。豈指老物發也歟。幸爲我謝諸益。而月斯征。我日斯邁。見先師於地下。足矣。

溪巖先生文集卷之四

<與李茂伯> 潤雨

積阻縣慕。寤寐勞心。伏惟此時。動履珍迪有相。弟自十月念後。得寒熱證。出入於生死路頭。不意遽有除職召命。委頓之中。驚恐罔措。從前以病。不得從仕於京。常切憫蹙。此番則雖死於中路。必欲趨謝恩命。而下部不仁。不能起坐於枕席。喘息奄奄。如不能終日。萬無起發之勢。此間狼狽憫迫之情。雖如兄相切。亦何能一一細悉乎。病重之狀。人所明知。憲吏亦目之而去矣。外論未恕。儻復如前日。則危迫情事。向誰告訴。惟兄憐弟而爲之地。自昔而然。區區肝膈。兄或遙度而見念耶。力疾倩草。精神瞽亂。萬不一宣。

浦渚先生集卷之十七

<答安牛山書>

慮外。忽承老兄千里書問。展讀驚喜。反復不置。因審物外起處萬佳。尤切感慰。且蒙寄示重峯先生當時與諸人論議事大略。得見先生持己接人之正。皆曾所未聞。極令人感歎而興起。昨者與裴宗度語。因及先生事。僕謂先生一生事蹟可法者。若不記錄。恐至泯沒。實爲千載之恨。今世惟老兄知先生事。其明日。來書乃至。此亦奇哉。裴生近欲南去。必陳此語矣。僕在位無絲毫之補。而衰謝已甚。精神筋力。更無可爲。方乞退休。當必得之。欲歸去廣州先塋之下矣。千里相望。此生何可得承晤語。思之悵悵。萬萬不能盡。

浦渚先生集卷之十七

<答宋明甫浚吉書>

春間便中。得承尊辱書。具審年歲來尊閒居體氣佳勝。至慰至感。迨不敢忘。鄙生。老病漸甚。近日則膝脚蹇澁。行步極艱。幾成痿廢。然老人常事。奈何奈何。諭及延平碑文事。生素非以追崇爲是。當時所陳疏筭今具在。豈有至於今日反攻沙溪先生之理乎。世間傳言者。每有意交構。可笑也。記文之屬。生於文字。少嘗有意爲之。其後放廢已久。況今老病。精神茫昧。豈是作文之時乎。然盛意不敢孤。僅粗撰掇荒蕪以仰塞。愧甚愧甚。相望闊遠。承晤無期。悵仰悵仰。不宣。

百源先生文集卷之二

<與鄭晏叔>

賢郎事。慘怛何言。但爲存者惻惻。無由涉此苦海。脩短之數。當初稟受有命。茲非向左右慰解語耶。無益之悲。終歸有涯之痛。韓子之悲不幾時。而不悲無窮期者。豈不信然。碩蕃亦不幸夏秋來連有弟姪之喪。俱白首同老。而及此晚景。忽分死生。所餘形骸惟塊然。正如霜後枯木。苦待臘月三十日之末耳。

記言別集卷之七

<與李禮安碩寬>

苦熱。仕履何似。老僕病益沈綿。何不一問耶。古詩曰。多病故人疏。左右於僕。亦如此耶。安得無憾。欲連筭期於必遞。未知果感天聽否也。病臥僅草。不宣。

童土先生文集續卷之三

<與俞武仲榮書> 己丑

表陰之請。非敢自外。而前月承教。許以相副。雖切日夜之望。實不料劃惠大篇。若是之神且速也。三復以還。不覺欽服。意正辭簡。蔑以加矣。豈容管蠡所可窺測。第有反復之端。則亦何敢不自盡於高明之鑑乎。身伏艸土。末由造於門屏。而值從者方有原隰之役。面承提誨。實未易期。惟此之恨耳。誌草亦蒙點教。尤極感幸。

童士先生文集續卷之三

<與俞武仲榮書> 癸巳

歲云暮。想惟履道百祥。地踔遠。叵耐離憂一倍。廢疾尚此遲回。孤負故人。室有滅性之虞。官多未了之事。公私非責。慨莫以當。日夜焦然。食息難恬。折腰已非陶令。掛冠長思梅尉。每誦高韻。實獲我心。餘縷忙艸不具。

童士先生文集續卷之三

<與鄭晏叔養書> 丙午

舜舉平生險釁。六親無完。萬事瓦裂。自鞠自刻。莫之勝說。豚搢倖科。弟兄歡會。日俟榮歸。而遽喪其耦。過福生災。一至此哉。涕泣相視。痛恨奈何。是婦行能絕倫。黽勉持家。病豚半生。受其忠養。恩未及報。最是傷神處也。

台溪先生文集卷之六

<與河重遠>

見西村往來諸友。問左右起居。皆曰別無大端證患。寢食與前一樣。深慰深慰。去年五月十一日所傳札。寘之案上。時時披閱。不啻如對。然不如真面目也。少而老。老而病。病而死。例也。不足恨。但與左右小少從遊。情義不薄。而賤疾已劇。若從此永辭。則死目不瞑。思之不覺缺然。晦間。送豚兒仰候動止。縷縷在其時備達。

炭翁先生集卷之五

<與宋英甫>丁酉正月二十六日

謹問哀候何如。英兄患症。知是危症。而未躬候。耿耿難忘。向得吉甫書。云揆之古義。不可無薑桂之滋。要我諄諄乎僉兄。愚之不肖。雖誠懇之至。何能動乎僉兄重禮義之至情哉。然伏想尊先靈惟疾之憂。不覺下淚。僉兄以爲如何。昨日力疾。強出鄉里。方困頓走草。

炭翁先生集卷之五

〈與宋英甫〉辛亥五月二十二日

某白。庶弟誠死染疾。實由積飢。先人時渠纔十歲。愚以弱冠。常擬百年共保。奄茲溘先。先人病革時。兄弟共聞之語。在耳如昨。餘生此日。何耐追感之痛骨肉之悲。伏蒙下問。悼其死之可惜。渠何以得此於諸先生長者之門哉。先人平生教子孫。每曰。不願吾子孫富貴利達。只願汝輩得爲善人。免爲惡人則幸矣。渠死不失善名於鄉人。已佳矣。況蒙門下悼其死。渠不忝先訓。其死不冤。夫何恨乎。墳前言可了。乃兄之久生。當復何如。伏感。下問之餘。悲懼何極。今始力疾立草。只此不備。

南坡先生文集卷之十一

〈答韓仲澄書〉

卽奉手字。將之以藜杖。足以扶持老病軀。免顛躓之危。厚意何可量也。至於扶國之危之誨。自顧無狀。不敢當不敢當。明朝自公歸路。敢不歷入承晤。

南坡先生文集卷之十一

<答趙奉化昌門書> 己丑

昨日。傳聞貴縣有虎行之變。謂爲虛語。然猶疑訝未已。卽因來便。伏承惠問。始審昨所聞不虛。不勝驚歎。且見舍姪書。御史之所執爲咎者。卽是千萬無據之事云。不知何許不悅之輩。做出此無形不近說話。構成虛誣之變耶。在左右雖內省不疚。而當此新化嚴明之時。被此疵累之橫加。其爲不幸如何。痛歎。卽欲馳進奉唁。以敘遠別之懷。而官事所拘。不得如意。尤切愧負。茲敢專伴。以書替面。

同春堂先生文集卷之十

<答李士深> 丁酉

伏讀聖教。大哉至哉。令人不勝感涕橫流。賴此一教。國家可以扶持幾十年。歆歎之至。言固不可以盡之矣。禮節不敢知。然既是曾在儲副之位。則陪祭恐無大妨。惟節目之間。應有裁減耳。如何如何。

同春堂先生文集卷之十

<與李士深> 丁酉

昨今台候起居如何。其無添傷否。仰慕仰慕。弟傷寒不輕。終夜苦痛。而勉強入侍。卽纔罷退矣。兩奏笏袖進之間。以陳俊卿行狀中一段及朱笏中輔養太子義利公私等數段。頗蒙獎諭。方孝孺一段。則將詢問大臣以處爲教。未知台將何以獻議耶。不宣。

同春堂先生文集卷之十

<與宋澤之> 國澤 ○辛卯

八耄頂玉。人世所罕。況子弟近臣。陳疏蒙異恩。耳目所未睹記。寒門之慶。曷可勝言。每對宗人。歎詫無已。卽惟仕履益佳。覲行當在何間。惟日企之。只此。

宋子大全卷三十

<與宋明甫> 己丑六月十六日

炎日流金。不能消別懷。遙想清坐涼風。不覺神爽也。邇間疾患如何。弟來後遭此大狼狽。彼時恨無挽我者。始知世上莫如我愛兄也。然鳴騶復入空谷。此後似與前少異否。各自冷煖。不敢更容僭喙也。泰兄想能一一。只此。

宋子大全卷三十

<答宋明甫> 己丑

院便拜覆。殊慰。此中昨暮。又移村家。數日後。弟則更欲就精舍耳。梁文憂撓如許。正使能之。似無暇。況其未能。且不必強長此浮華之習也。黃祝。儘好。然第二文。抑揚太過。如我淺陋。不敢容議於其間。且首句若是輕說。而繼以斯文未喪。則亦自不襯著。似起爭端。幸更商量也。敢以拙見錄奉。萬一備財覽否。未涯相見。戀鬱何已。擾甚只此。○真知實踐。淵源正脈。斯文永賴。啓我無極。

市南先生別集卷之四

<上愼獨齋金先生> 乙未

毒暑纔退。新涼乍添。伏未審此時體中萬福。區區伏慕不能少弛。前日因尹持平家便。伏承下復書。副以疑禮說數條。至今感悚交中。槩以身病彌久。迄未克趨造門下。以卒承下教。罪恨恒切。聞宋參議卜兆。觸處狼狽。宋執義又遭伉儷之慘。知舊之間。禍厄洵仍。伏想出於運氣之相關也。秋夕行祀後。卽擬趨謁。先此伏候起居。適痢病苦劇。顫頓悚仄。不宣。

市南先生別集卷之四

<與宋英甫書> 丙戌

昨上一候。未拜下復。忽自湖上。承得情翰。披慰之極。無以爲謝。況審乖候。經履起居神衛增吉。弟自錦歸後。連汨憂故。甚無好況。自憐奈何。草兄消息。近何得聞耶。數昨。自尼山聞病重之過去報。而未得信報。鬱悶。老谷尼山事。昨於春書。有酬酢矣。大抵此事。弟以爲不然。賞罰乃天理之公。功罪相半者。并論其功罪。始得合理。只罰其罪而不賞其功。固未知其然也。況此人則功大而罪細。以其微失。并削其勳。烏可以勸後世之爲國事者乎。然弟有些嫌。不敢開口。未知兄料如何。

市南先生別集卷之四

<與宋英甫書> 六月

意外因鎖价。承拜損札。就審行期已戒。想已就道。伏暑長程。不瑕添傷。區區貢慮。已不可言。此外多小。尤庸耿耿。天祚國家。必有定數。惟是祝禱。辱教曲折。何敢當也。兒息方在洛下。早晚因之奉覆。

草廬先生文集卷之十一

<答愼齋金先生書> 庚寅

惟謙之行。恭修一書。即蒙手書之辱。伏審春來台體 康勝。感慰之劇。有難容喻。侍生兄弟一政並除。豈不榮光弊門。慰悅老母。而顧茲庸鄙。無以報答天恩。恐爲門下之累。而狼狽於是益甚。惶蹙愧懼。罔知攸措。明兄下來。英兄輟行。未知於義果何如。而竊想門下多少有懷耳。人心難定。天意易動。查縛之舉。必在早晚。諸公今日不合退縮如避事然。然如微末賤跡。亦各有分。固當退伏。以俟禍福之來耶。伏乞細量指教。

魯西先生遺稿卷之五

<上慎獨齋>

宣舉今行。只欲拜疏於城外。不敢謝恩而歸矣。及到圻內。聞都下儒疏臺啓大擾。入京不便。故呈疏於果川。初疏未允。再疏蒙遞。未免少變於初計。而自念既進江外。似無偃息之嫌。再次陳列。悉暴罪累之情。自此庶得遂志於田間矣。繼得在都諸書。則皆以不入謝恩爲非。誠使宣舉入城而不謝恩。則定未免一場唇舌矣。既不可謝恩。又必欲陳情。其勢終至於江外而已。半上落下之歎。自知不能免矣。頃日拯子之進也。委賜諄誨。辭旨勤懇。聞來不覺瞿然。而已展難縮。罪悔奈何。第念釁累心迹。終始與宋承宣諸人進退之義不同。故私心所主。只是一進陳情而退。反復思惟。不過如今日之行而已。當俟數日後。趨進席間。畢承幸教。姑此略申下悃。

荅山陰倅書

葵窓遺稿

天涯一別問開無憑雲山迢迢夢之亦難一念

庚

三

耿々寤寐未忘不意茲者得承兄書悅接風範
圭覆再三不忍釋手况審嶺外瘴炎閣侯平迪
千里所冀此外何道茅頑命不死忍經禪事益
增同趣而家禍未盡乃於亡兄再暮之日又哭
弟嫂此中悲痛情事羞向吾兄道也節扇之惠
出於望表深感故人不遺之情也弟之免喪已
過累月而兄不我問弟之醮子亦在夏初而兄
不我助是何平生相厚之至意也深有憾焉餘
萬々非面難既姑惟兄照